

Tááítati itáíq-itaiq íyábá áanikoraa-nakonopaq Póroma kétitana Tímoti agatáye.

1 kemá Póroma Áánûqtuni mayaí-náqá kemá Ítu Káríqtoma timátíkarai-naqune. Áánûqtuma wetábá aúyáq-makai-kayukayopaq timátíkaraiye. yemá yeráwáqtí itáíq-itaiq í-yátááqá yíwáqnnaa kéunata akoqnáá kéoe. yemmá áraina-aiqtaba kéteta Áánûqtuma akáinaiq ínôqtaba yíwáqnnaa kéune.

2 matúq-matuq umá mái-auwaraimma ketáámá awé kéunataama wenáaimma mimórá-áráín-áíné. minnáyaba Áánûqtuma naayóbáqá timá akoqnáá umákain-aimma timátuwena wemá aati-aatimá kaaqaarí-áímmá íketiye.

3 Áánûqtuma awaaméqá umákai-kanaaraqa wení átê-wataama keqtáá tímikaiqtaae. ketáái atóbamatikai-naqa Áánûqtuma min-áté-wátáámá waabá-káyúkábí timá-yimenunayaba kemmá wakútikaraiye.

4 Tááítatima ketáaniko, ketibotáámá Áánûqtugaraq keqtáá yauwéqma tiwiraíybá kukáin-naqa Ítugaraq yenákátí íráqô-qtataakogaraq kaayoné-yátáákókáráq emmá áméttaao.

5 Tááítatio, Karíti-marupaqa emá máqte-qtataaqa mamá arupú íkáae téq kemá emmá ayúkaune. máqtemma móra-mora-marupaqa Ítuni waayúkama móra-iyakaq maréta kémae-yuti kawáá-wáyúkámá yiwiraíkáae téq emmá ayúkaune.

6 yemá mi-kawáá-wáyukámá yeqtí otaammá íma waéna yemá kímora-inimma máráaro. yeqtí iyápó-anname Ítuqtaba itáíq-itaiq umá máero. min-iyápó-ánnámá yeqtábámá tawí-aaiqtababi ámáan-aimma arátéqtaba waayukama yúbi kanaaráq íma maráiyán-o-iyapoma máero.

7 kawáá-nákómá Áánûqtuni mayaíybá kawáá kéye. minnáyaba wemá arupú umá uréire kéina kúmiq-yataariq íma íno. wenaúma íma maména uíno. wemá páatákáá áyámma íma íno. wemá taíbaq aíbôq-nomma íma naíno. wemá íma áwáábiq kaíno. wemá móneqtabama aúyánámmá íma itaíno. mirá ínimaniibo

8 wemá namuq-wáyukámá yíwáqnaa umá wení naaúpaq yiwiqma yikaíno. Iráqô-qtataaqtaba wemá akaíno. wení aúgomma yáqtoraino. wemá máqte-qtataariq ínénama aúyánámmá ítama arútátuwena miraíno. wemá Iráqômma yainaí-náqá maíno. wemá Áánûqtuqtaba aokaríq umá maíno.

9 wemá árain-aimma kemá emmá aráátúnnama yáqtoqma akoqnáá íno. miráinana wení yirááti-yataakoma arupú ínana káqo-kayukama umá yíqtaiq éna wemá árain-aimma paábaq awétátuwaiya-kayukama yetáama kanaaráq aúyaqtuwaniye.

10 táibaq-wayukama kemá yiráátúnna-aimma waránôqtaba kaúbîq kéowaq minnáyaba kemá tirummá kéye. yemá paá-aimma kéteta káqo-kayukama makáqma kéyiwraae. yaímma maamikáyukábímmá paá-aimma téta yúma karaí-áímmá kéte.

11 yetáama timá aúyaraao. abo waagógáráq aara iyápógaraq yeqtí itáíq-itaiq umá mái-yataaqa yemá

mamá kékawarapaae. móneqa mayánáae tétaboata yemá íma tewáín-áíkáráq kéteta kékiraate.

12 Karíti-marupakemma mórama yeqtí amunénákómá maará téna tiráine: “Karíti-marupaq-wayukama yemá aati-aatimá kaaqaari-áímmá kété. yemá tawí-wayuka maéta pirúq nááruq íkákáá umá mááe. paá aáwaqa naiyábá yúyánámmá kékitaee.” téna tiráine.

13 mirámô tiráimma minnâ áraimiye. miráinaa emá Karíti-wayukati íarutain-aaqtaba akoqnáá umá timá-yimeaq yeqtí itáíq-itaiq í-yátááqá arupú umáyikaa.

14 yaímma Ítíráaeo-wayukama kaaqaari-áímmá timá-yimen-aaqtabama yemmá íma iyúwénata ítáaro. itáíq-itaiq íkéo-kayukati yúyánápíkén-ámáán-áímmá yemmá íma iyúwénata wáráaro.

15 mi-káyúkámá náayubi yeqtí yúyánákómá íráqôníq kékitanama máqte-qtataakoma yúrakaqa íráqôníq umá abarokáq kékite. miráimanibo mi-káyúkámá náayuwabi Áánûqtuqtaba íma itáíq-itaiq o-yúmá yeqtí yúyánákómá miráuma waátáraa kékite. yeqtí yúyánákómá námôma káuraiye. yigaemá iyátábámá íkékitaee.

16 yemá téta “Áánûqtuqtaba kékitaunatae” kétetamanibo yerawáqá nôrawabi o-qtátáákómá keqtáá tiráátimma yerawáqtí yáagoma paá kaaqaari-áíné. tawí-aaikaraq kéketa Áánûqtuni ámáan-aimma kárate. yemá máqtemma íráqó-qtataariq kanaaráq íkéoe.

2

1 Tááítatio, emá arupú ína-yataaqtaba yiráátiyo.

2 anónuqma-wayukama timá yímînatawaq yemá taíbaq aíbôq-nomma íma naaro. timá yímînatawaq yemá karuwaaq éta yúyánámmá ítama arútáaro. timá yímînatawaq yemá ítâíq-itaiq umá maétawaq yíbâqawaaraa-kayukama yirummá yimí-yátáápi Ítukaq yáqtoqtoraaro.

3 araaqná-noinikaraq timá yímînatawaq yemá nôrawabi íya-qtaqtaapimma Áánûqtuni áaikaraq yiráátero. yemá waayükama mamá táíq umáyikaimma íma tero. yemá aíbôq-nokoni akoqnáágón aménáápáqá íma máero. min-árááqnágómá yemá paá íráqô-qtataaqtaba yiráá týyata

4 yemá aúgen-noinimma yeqtíwaikónábi yeqtí iyápo-annama yirummá amí-ááímmá yiráátero.

5 yemá aúgen-noinimma yúyánámmá ítama arutéta Áánûqtun-aurakaq íráqôníq íyábá yiráátero. yeqtí yúgomma yáqtoqaaro. yemá yiwaikóqtábá íráqôn-inimma maéta yeqtí iyápo-annayaba íráqôn-inimma maéta kaayoné íyábá yiráátero. yemá yeqtíwaikómá akáina-yataariq oro. aúgen-noinimma máqtemma mi-qtátááriqo íyatama kâqo-kayukama Áánûqtuni átê-wataayaba íma timá táíq umátkanoqtaae.

6 móraiq umá emá awaayatí-wáyükámá akoqnáá umá timá yímînatawaq yeqtí yúgomma yáqtoqma akoqnáá oro. yemá yeqtí yúraqa akoqnááma mamá yabíyéro. yeqtí yúgoma kanaaráq wakúyakaiyanawaq abo yeqtúgoma yetáama Wáráaro.

7 Tááítatio, emá enamááriq íráqôn-akaq kékmae-qtataakoni awaaméqá mááo. yemmá

yiráátinama árain-aaikoma yúwénana abarokáq waínaa karuwaaq uwo.

8 ení watáama arupú umá áraimma tinatamá móra-waigoma minnáyatapa íma kanaaráq timá táiq umákaniye. miráinana móra-waigoma ení watáagoqtapa timá táiq énama wemá agaeyábá íniye.

9 mayái-wáyúkámá pááqyan-iwiqa wáitata meyámmá íma máyáa-kayukayabama maará téaq timá-yimiyo. yemá paá yeqtí kawáá-nákón áama waréta máqte-qtataariq íyaqtabama yimuqá maqylkáaro. mi-máyái-wáyúkámá Ítukaq itáiq-itaiq o-káyúkámá agaren áaimma ítero.

10 yemá moyámmá íma máyáaro. yemá máqte-tupaama yeqtí kawáá-nákóní anaaémma kewaraiyatama waayúkama yetáaimma keyimonetama “atóbamatikai-naqa Áánûqtuqtaba yirááten-aimma íráqô-qtataare” téta tínoe.

11 Áánûqtuma wení íráqô-qtataaqa pááq uráinapoana máqte-kayukama kúmiq-yataapike yiwiqma paábaq yínîqtaba Ítumma timákariye.

12 Ítuma tirááténataa “máqte-tupaama Áánûqtuqtaba taákaq máráaro.” téna tiráiyé. ketáái túgoma akáina-yataaqa waraí-ááimmá paábaq yúwáaro. minnáyabagaraq Ítuma tiráátiraiqtaae. mirá íyonunataamanibo ketáámá íráqôn-akaq kemaunayabataa tiráátiraiqtaae. mirá éqtaama ketáámá maakáq maa-márábí máeqtaama ketáái túraq yabíkéqtaa Áánûqtun-aama kewaraunatae.

13 íbêqa ketáámá mi-qtátáákómá keqtáá mamá íráqôníq umátikani-qtataaqtapa awétáá kewunatae.

minnáe. ketáái anón-Aanuqtuma keqtáá yauwéqma tiwíkai-naqa Ítugaraq wení tágama-yataapi yenákámá abarokáq íyóye.

14 Ítuma wenamáárîq wenaúma yúwáitata ikámôwana wemá kaapaq-yátáq pukuráiyie. wemá miráuraiqtaba keqtáámá ketáái kúmiq-yataapikemma tiwíkaipoaqtaa Áánûqtuqtabama kanaaráq aokarîq umá mánunatae. Áánûqtuma wenamáa wenná auránúnayabataa wemmá kákaiye. abo ketáámá wení íráqôn-ayuanamma waréqtaa timuqá kémareqtaa mirá ónúnayabataa wemmá kákaiye.

15 maamin-áímmá yemá náayuwabi Ítuqtaba itáíq-itaiq kéo-yuma timá-yimiyo. yemmá umá yíqtaiq kéewaq mamá arupú umáyikaa. emá mirámo ínönnayaba mútûq-naapaamma matáane. miráinata máqte-kayukama emmá yikaq ákáaro.

3

1 itáíq-itaiq kéo-kayukama maamináyaba timá yaákaq umá yimiyo. máqte-kayukama yemá yabíkáa-kayukati yiménáápáq paá máero. timá yímînatawaq máqtemma arupú-mayaíma mayánôqtaba yokaa umá máero.

2 timá yímînatawaq káqo-kayukayaba táí-aimma ítero. unítíq-aimma ítinomanibo kaayoné umá káqo-kayukama yemmá múte yeqtímûraapaq yíkáaro.

3 móra-taoqa ketáámá máqtemma neginaagí uráunatae. ketáámá maaráráá uráunatae. Áánûqtuni aammá íma wakáunataamanibo waátágoni aammá wakáunatae. aati-aatimá ketáái

túgoni akaí-yátááqá maréqtaa yaímma waátá-yataaqtabataa timuqá makáunatae. yaímma-wayukati yineqá tawí-yataaqa páaq iyátábámá tíkaraiqtaae. káqo-yuti mi-qtátááqtábá ketáámá túrananna uráunatae. káqo-kayukama keqtáámá ítama táiq umátíkaawaqtaa ketáágáráq yemmá ítama táiq umáyíkaraunatae.

4 miráitana atóbamatikai-naqa Áánûqtuma wení kaayoné-yátáákáráq akaí-yátáákómá keqtááyôpaq irááyamma

5 Áánûqtuma keqtáámá waátágoni aapaké tiwíkaiqtaae. ketáámá kateko-yátááriq únnayabataa íma tiwíkaiqtaamanibo wení paru-yátáápíké keqtáá yauwéqma tiwíkaiqtaae. keqtáá tete umátíkáaraqnaraa umá ketáái kúmiqa paábaq matukáiy. miráitaqtaa ketáámá aúge-tuwaraimma Aokaq-Áánápó matáunatae.

6 Ítuma keqtáá yauwéqma tiwíkai-nakoqtaba Áánûqtuma wení Aokaq-Áágómá keqtáámá ôriq umá tímikaiqtaae.

7 Áánûqtuma wení íráqô-qtataaqnapo ketáái kúmiqa paábaq matuwéna awikátukaiye. wenaúrakaq ketáámá kateko-wáyúkámá aúkáunatae. abo Ítuma pukáitababoqtaa ketáámá wení íráqôn-aanimaakaa umá maéqtaa aboání máqte-qtataaqa mayánúnataama matúq-matuq umá mái-auwaraimma mayánúnatae.

8 maamin-áímmá áraipoaa emá ókaraq-okaraq umá yiráátikaae téq kétune. miráinata itáíq-itaiq kéo-kayukama waayúkama yíwáqnaa í-máyáímá kémayeta íráqoniq umáyíkáaro.

9 timá yímînatawaq yemá yeqtí yítaubikoni yíwîqtabama paá-aimma ítero. timá yímînatawaq yemá ámáan-aiqtabama unítíq ááiq-aimma íteta nóbíq-naabiq-aimma ítero. mirá kéowanama yaímmakanaama paá-aukaapi kékawitata waayúkama íma yíwâqnaa kéoe.

10 móra-waigoma Îtuqtaba móra-iyakaq maréta kémae-kayukama yatáq yikanena maqmá aónáinaama emá min-nákómimá mórabarabi kaayapáq timá ááqa yórénana íma itáinaama min-nákómá anaaémma umá ameyaq wenôpkemma nékaq mááo.

11 abo miráráá i-nákómá wení aúyánákómá kaé kááitana wení kúmiq-yataakoma tiráátiqtaama wemá íkarutaiye.

12 kemá Ááqtaminabi Tíkikati wemmá enôpaq kétimakaune. wemá enôpaq ko yamá wínaama Nikááporitibaq emá yínônayaba maqmá aónaao. mibágá yaugi-kánáábímmá kemá ko mánune.

13 Tínatima ámáan-amma ítarai-nakaraq Aapórogaraq yenákámá ayáqtááq-amma áaimma átáma wíyéta kékyaama yenákámá nöiqtababi íyamma yíwâqnaa umá yimiyo.

14 kerátái waayúkama timá yímînatawaq yemá káqo-kayukama nöiqtababi íyamma yíwâqnaa oro. kerátái waayúkama káqo-kayukama yíwâqnaa íyábámá yeqtí íráqôn-aaimma yiráátero. itaa. yaagómá íráqôn-aaimma wáiq-tagoma íráqôn-aramma kékyaiae. móraiq umá waayúkama yemá íráqôn-aaimma wá-i-yuma yemá íráqô-mayaime kékmayaae.

15 máqtemma náayuwabi ketê maakáq máa-yuma

yemá miráono-maaraono-aimma enôpaq yúwáawana
kéuwiye. ketáái miráo-maarao-aimma ketáái
aanábómmá itáíq-itaiq umá ketátâte yagaroqtamá
kémae-yubaq yuwáunananataa kéuwiye.

Áánûqtuni íráqô-qtataakoma keráwáqtê waíno.
kemá Póroe.

**aúgen-anona-anon-aimma
Genesis 12-22 and The New Testament in the Usarufa
Language of Papua New Guinea
Nupela Testamen na sampela hap Buk Stat long
tokples Usarufa**

copyright © 1980 Wycliffe Bible Translators, Inc.

Language: Usarufa

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2012-10-23

PDF generated using Haiola and XeLaTeX on 28 Dec 2024 from source files dated 31 Aug 2023

0cfecb85-a1ae-5e2f-a3f0-4c221d1d6c84